

**BASES REGULADORAS E CONVOCATORIA DOS PREMIOS DEMO DAY
CORRESPONDENTES AO PROGRAMA "DEPOEMPRENDE" 2021-2022. MODALIDADE DO
PROXECTO: "DEPOEMPRENDE NA FP"**

A Deputación de Pontevedra, a través do Servizo de Promoción de Emprego e Desenvolvemento Local, pon en marcha o programa "DepoEmprende" 2021-2022, segundo a convocatoria publicada no *Boletín Oficial da Provincia de Pontevedra* (BOPPO), núm. 123, de 30 de xuño de 2021. Esta convocatoria está dirixida aos centros educativos sostidos con fondos públicos da provincia de Pontevedra e dependentes da Xunta de Galicia para participar nos diferentes proxectos que acolle o devandito programa: "DepoEmprende na escola", "DepoEmprende na ESO" e "DepoEmprende na FP".

A finalidade do proxecto "DepoEmprende na FP" é promover entre o alumnado de formación profesional de grao medio e superior a iniciativa emprendedora, tanto no ámbito empresarial coma no autoemprego, e tamén a actitude necesaria para asumir riscos e responsabilidades. A metodoloxía proposta baséase en elaborar e xestionar proxectos empresariais para que o alumnado asuma o risco de afrontar diferentes situacións laborais e, deste xeito, mellore a súa participación activa na vida económica, social e cultural da súa contorna.

Con este fin, convócase unha nova edición dos Premios Demo Day, que teñen por obxecto fomentar o lanzamento das diferentes propostas elaboradas polo alumnado participante en "DepoEmprende na FP" a través dun proceso participativo, competitivo e secuencial que permita identificar e apoiar proxectos susceptibles de ser desenvolvidos.

As bases reguladoras e a convocatoria axústanse ao disposto na Lei 9/2007, de 13 de xuño, de subvencións de Galicia (LSG), en concreto, no relativo aos principios de obxectividade, concorrencia e publicidade na concesión de subvencións, así como ás disposicións aplicables da Lei 38/2003, de 17 de novembro, xeral de subvencións (LXS).

En consonancia co anterior dispónse:

Primeira. Obxecto

Estas bases teñen por obxecto regular a convocatoria dos Premios Demo Day (edición curso escolar 2021-2022), desenvolvida no marco do programa "DepoEmprende" 2021-2022, na modalidade de proxecto "DepoEmprende na FP".

Segunda. Centros educativos destinatarios

Esta convocatoria está dirixida aos centros educativos de formación profesional da provincia de Pontevedra adheridos ao proxecto "DepoEmprende na FP" 2021-2022 (BOPPO núm. 123, de 30 de xuño de 2021):

1	CIFP VALENTÍN PAZ ANDRADE
2	IES JOHAN CARBALLEIRA
3	IES DE RODEIRA
4	CFEA DE LOURIZÁN
5	CIFP CARLOS OROZA
6	IES MANUEL ANTONIO
7	CIFP A XUNQUEIRA
8	COLEGIO SAN MIGUEL S. L.
9	CEBEM CENTRO DE FORMACIÓN PROFESIONAL

Terceira. Número de proxectos que se poden inscribir por centro, categorías dos premios e programa "Aceleración de proxectos"

3.1. Os centros educativos participantes no proxecto "DepoEmprende na FP" 2021-2022 poderán presentar ideas e proxectos impulsados polo alumnado participante no marco desta convocatoria.

3.2. Cada un dos centros educativos participantes poderá presentar como máximo dous proxectos de entre os desenvolvidos no marco do proxecto "DepoEmprende na FP" 2021-2022; o centro educativo será o encargado de seleccionalos, segundo os criterios de valoración establecidos na base sexta.

No caso de que un centro educativo participe no proxecto "DepoEmprende na FP" cos ciclos formativos de grao medio (GM) e grao superior (GS) simultaneamente, poderá seleccionar como máximo dous proxectos de grao medio, dous de grao superior ou un de cada grao; nesta circunstancia deberase valorar positivamente que o alumnado de ambos os graos teña a oportunidade de participar nos premios.

3.3. Segundo o disposto no Decreto 114/2010, de 1 de xullo, polo que se establece a ordenación xeral da formación profesional do sistema educativo de Galicia, e debido a que os centros participantes de FP pertencen a diferentes familias profesionais, estableceranse dúas categorías de proxectos, e diferenciarase entre o alumnado que pertenza a grao medio e ao superior.

3.4. Para que poidan concorrer as dúas categorías (GM e GS), establécese un número mínimo de tres proxectos para a categoría de grao medio. Deste xeito, no caso de que nesta categoría

non se alcance o número mínimo de tres proxectos inscritos, fixarase unha única categoría, na cal concursarán todos os proxectos por igual e cos mesmos criterios de valoración.

3.5. Unha vez que os centros educativos seleccionen os proxectos que se presentarán aos Premios Demo Day, a Deputación de Pontevedra, mediante o Servizo de Promoción de Emprego e Desenvolvemento Local, organizará un programa intensivo para apoiar e asesorar os proxectos denominado “Aceleración de proxectos”, antes da celebración dos Premios Demo Day e nas datas que determine a institución provincial. Os centros educativos estarán obrigados a:

- a) Participar en todas as actividades de formación e mentoría
- b) Desenvolver con aproveitamento as sesións de asesoramento, cumprir o calendario de actividades e participar de maneira activa no programa intensivo
- c) Comunicarlle á Deputación de Pontevedra calquera incidencia que poida afectar de xeito significativo o desenvolvemento do proxecto ou da actuación

3.6. O incumprimento das obrigas citadas nesta base dará lugar á perda da condición de participante nesta convocatoria dos Premios Demo Day.

Cuarta. Procedemento de inscrición e presentación de solicitudes

4.1. Os centros educativos participantes no proxecto “DepoEmprende na FP” 2021-2022 deberán inscribirse nos Premios Demo Day obrigatoriamente por vía electrónica, a través do formulario normalizado dispoñible na Sede electrónica da Deputación de Pontevedra (<https://sede.depo.gal>), de acordo co establecido nos artigos 14.2 e 16 da Lei 39/2015, de 1 de outubro, do procedemento administrativo común das administracións públicas (LPACAP).

4.2. Para a presentación de solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistema de usuario e contrasinal) e certificados electrónicos (incluído o DNle).

4.3. Os proxectos empresariais presentados deberán ser orixinais; entenderase por orixinal aquel que non fose copiado, reproducido nin imitado, en todo ou en parte, doutro anterior.

4.4. As candidaturas deberán facilitar no formulario a información requirida relacionada co proxecto, que é a seguinte:

- a. Nome do centro
- b. Nome do proxecto
- c. Número de persoas que participan e nomes e apelidos das alumnas e alumnos autores do proxecto
- d. Nome da ou do docente, ou da titora ou titor do proxecto no centro educativo

- e. Denominación do ciclo formativo e da familia profesional; especificarase se é un FP de grao medio ou superior

4.5. Unha vez que o Servizo de Promoción de Emprego e Desenvolvemento Local revise as solicitudes, non se admitirán a trámite aquelas que non cumpran os requisitos establecidos nestas bases, e dítarase a oportuna resolución.

Quinta. Prazo para a presentación de solicitudes

O prazo de presentación de solicitudes será de dez (10) días hábiles, contados a partir do día seguinte ao da publicación destas bases no *Boletín Oficial da Provincia de Pontevedra* (BOPPO).

Sexta. Premios

6.1. De entre os proxectos presentados aos Premios Demo Day premiaranse os mellores segundo as cualificacións do xurado, atendendo aos criterios establecidos no anexo I. Os premios, dotados cun importe total de mil novecentos euros (1.900,00 €), distribuiranse do seguinte xeito:

- Categoría de grao medio:
 - Un único premio, dotado con 700,00 €
- Categoría de grao superior:
 - Un primeiro premio, dotado con 700,00 €
 - Un segundo premio, dotado con 500,00 €

6.2. De non alcanzarse o número mínimo de proxectos presentados na categoría de grao medio, que serán como mínimo tres, de acordo coa base 3.4., establecerase unha única categoría con tres premios:

- Un primeiro premio, dotado con 900,00 €
- Un segundo premio, dotado con 600,00 €
- Un terceiro premio, dotado con 400,00 €

6.3. O desembolso da contía das dotacións dos premios irá con cargo á vinculación da aplicación orzamentaria 22/240.2411.489.00, que ascende a mil novecentos euros (1.900,00 €).

Sétima. Xurado

7.1. A concesión dos premios obxecto desta convocatoria realizarase segundo a proposta dun xurado nomeado e presidido pola deputada delegada de Promoción Económica e Emprego ou pola persoa en quen delegue, que valorará os diferentes proxectos empresariais seguindo os criterios de valoración establecidos no anexo I.

7.2. O xurado estará integrado por representantes da Deputación e do sector empresarial, que actuarán segundo o disposto para os órganos colexiados na Lei 40/2015, de 1 de outubro, de réxime xurídico do sector público:

- Presidenta: que exercerá a deputada delegada de Promoción Económica e Emprego da Deputación de Pontevedra ou persoa en quen delegue
- Secretario: que exercerá o xefe do Servizo de Promoción de Emprego e Desenvolvemento Local da Deputación de Pontevedra ou persoa en quen delegue
- Vogais: ata un máximo de cinco persoas, que serán representantes do sector empresarial e de emprendemento

7.3. Na composición do xurado procurarase unha presenza equilibrada de mulleres e homes.

Oitava. Acto de celebración dos Premios Demo Day

8.1. Previsiblemente, os Premios Demo Day terán lugar de forma presencial no lugar e na data que estableza a Deputación de Pontevedra.

A realización do acto presencial dos Premios Demo Day estará condicionada ás decisións que tomen as administracións competentes en relación coas medidas necesarias para previr a propagación da COVID-19, e organizarase de acordo coas restricións vixentes nese momento.

Cada membro do xurado valorará os proxectos empresariais antes deste acto, e a parte correspondente á presentación, o propio día do acto de celebración dos Premios Demo Day.

Os centros educativos premiados daranse a coñecer o mesmo día.

8.2. Se non se poden desenvolver de forma presencial, os Premios Demo Day realizaranse telematicamente. Neste suposto, os centros educativos participantes deberán achegar as presentacións dos proxectos empresariais inscritos mediante materiais audiovisuais elaborados polo alumnado, que acompañarán o resto da documentación na forma e no prazo establecidos na base décima.

O Servizo de Promoción de Emprego e Desenvolvemento Local remitiralle toda a documentación relativa aos proxectos e a ficha de valoración a cada membro do xurado (segundo os criterios establecidos nestas bases).

8.3. A Deputación de Pontevedra notificaralles aos centros educativos participantes a modalidade, a data e o lugar de celebración dos Premios Demo Day coa suficiente antelación.

Novena. Comprobación de datos

9.1. Para a tramitación deste procedemento consultarase automaticamente os datos incluídos nos seguintes documentos, elaborados polas administracións públicas:

- Verificación do NIF da entidade solicitante
- Certificación de estar ao corrente dos pagos coa Axencia Estatal de Administración Tributaria, coa Seguridade Social e coa Facenda autonómica

No caso de que as persoas interesadas se opoñan ás devanditas consultas, deberán indicalo no cadro habilitado no formulario de inscrición e achegar os documentos correspondentes.

9.2. Excepcionalmente, se por algunha circunstancia non se puidesen obter os citados datos, poderáselles requirir ás persoas interesadas que presenten os documentos correspondentes.

Décima. Documentación

No prazo de cinco (5) días naturais antes da data de realización dos Premios Demo Day, os centros educativos admitidos deberán facilitarlle ao Servizo de Promoción de Emprego e Desenvolvemento Local, mediante instancia xenérica, presentada por rexistro, segundo o establecido no artigo 16.4 da LPACAP, a seguinte documentación por cada proxecto inscrito:

- Proxecto empresarial en formato PDF: desenvolvemento completo do plan de negocio
- Resumo executivo do proxecto: documento dunha ou de dúas páxinas no cal se recolla a proposta de valor de forma clara e concisa, así como a información clave sobre o proxecto empresarial

Se os Premios Demo Day se desenvolven de forma telemática, deberase achegar, xunto con esta documentación achegada mediante instancia xenérica, o material audiovisual de presentación dos proxectos empresariais, o cal, neste caso, se poderá enviar por correo electrónico a depoemprende@depo.es.

Antes da data de celebración dos premios, a devandita documentación remitiráselle ao xurado, o cal examinará e valorará os diferentes proxectos.

Décimo primeira. Publicación de actos administrativos

11.1. Unha vez rematado o prazo de dez (10) días hábiles fixado para presentar as solicitudes, a institución provincial ditará unha resolución na que declarará aprobada a lista provisional de centros educativos admitidos e excluídos, que se publicará na Sede electrónica e na web institucional da Deputación, de conformidade co establecido no artigo 45 da LPACAP.

Os centros educativos excluídos disporán dun prazo de dez (10) días hábiles, contados a partir do día seguinte ao da publicación da resolución, para poder emendar, no seu caso, o defecto que motivase a exclusión.

11.2. A proposta de resolución coa relación de premiados derivada da decisión do xurado publicarase na Sede electrónica e no taboleiro de anuncios da Deputación, de conformidade co establecido no artigo 45 da LPACAP, unha vez realizado o acto presencial ou telemático dos Premios Demo Day.

Unha vez aprobada a proposta de resolución, elevarase ao órgano competente, que resolverá sobre a concesión dos premios, e publicarase no BOPPO, na Sede electrónica e na web institucional.

Así mesmo, estas bases publicaranse na Base de Datos Nacional de Subvencións (BNDNS), de conformidade co establecido na LXS.

Décimo segunda. Incumplimento das bases

A falsidade nos datos facilitados polas persoas participantes no concurso dará lugar á exclusión inmediata do proxecto presentado. Se esta se puxese de manifesto tras a resolución do concurso e o proxecto afectado fose premiado, o premio obtido quedará sen efecto ou, no seu caso, reintegraranse as cantidades percibidas por tal concepto.

Décimo terceira. Propiedade intelectual dos proxectos

Todas as persoas que concorran a esta convocatoria recoñecen o seu dominio do título e lexitimación suficiente sobre os contidos incluídos nas ideas, e manifiestan non infrinxir ningún dereito de propiedade intelectual ou calquera outro que poida ostentar calquera terceira persoa en España ou no estranxeiro sobre os contidos; así mesmo, eximirase a Deputación de Pontevedra de calquera responsabilidade relativa ao uso dos citados contidos.

En todo caso, as persoas participantes asumen baixo a súa exclusiva responsabilidade as consecuencias dos danos e das perdas derivadas do uso dos contidos das súas ideas, así como a súa reprodución, difusión ou distribución. Deste xeito, a Deputación de Pontevedra non se responsabilizará no caso de que a idea ou proxecto que se propón ou calquera dos documentos presentados polas persoas solicitantes ou participantes vulneren dalgún modo os dereitos de terceiras persoas en materia de propiedade intelectual, industrial ou de calquera outra índole.

Décimo cuarta. Protección e cesión de datos

Os datos persoais obtidos neste procedemento serán obxecto de tratamento pola Deputación de Pontevedra en calidade de órgano responsable, coa finalidade de xestionar este procedemento, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado “normativa aplicable”, dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia e ao público xeral dada a publicación de actos prevista.

As persoas interesadas poderán acceder, rectificar e suprimir os seus datos, exercer outros dereitos ou revogar o consentimento segundo o previsto en <https://depo.gal/proteccion-dedatos/exercicio-de-dereitos>.

O acto dos Premios Demo Day poderá retransmitirse a través da páxina web da Deputación de Pontevedra e as imaxes poderán ser obxecto de publicación.

Décimo quinta. Interpretación, modificación e suspensión das bases

A Deputación de Pontevedra estará facultada para interpretar e resolver as dúbidas que poidan suscitar as bases desta convocatoria. O órgano competente para aprobar estas bases poderá modificalas, suspender a convocatoria do programa ou declarar as vacantes que considere oportunas.

Para todo o non previsto nestas bases o xurado queda facultado para resolver as dúbidas que se formulen e adoptar os acordos que se estimen necesarios para ese efecto.

ANEXO I

CRITERIOS DE VALORACIÓN

Os criterios de valoración dos proxectos empresariais por parte do xurado para determinar os premios en cada unha das categorías serán os seguintes:

Valoración do proxecto : 80 %

Solución innovadora: 10 %

Creatividade na idea de negocio, utilidade do produto/servizo ofertado, mellora para a futura clientela...

Contribución social do proxecto: 20 %

Tratamento das necesidades existentes na sociedade, integración na economía e na contorna local, impacto no desenvolvemento do territorio, grao de conexión coa realidade...

Solidez e viabilidade do proxecto: 40 %

Equipo promotor, viabilidade económica e técnica, deseño do plan de distribución, comunicación comercial, estratexia no establecemento dos prezos...

Aplicación dos Obxectivos de Desenvolvemento Sostible (ODS): 10 %

Plans estratéxicos, plans de sostibilidade e outras actuacións que axuden a acadar os diferentes ODS

Presentación: 20 %

Calidade, claridade e argumentación: 20 %

Calidade e argumentación clara e coherente, selección e creatividade no uso das ferramentas TIC elixidas para a presentación, mostra de produtos ou servizos, uso da imaxe corporativa na presentación

Se os Premios Demo Day se desenvolven de forma presencial (base 8.1), os criterios de valoración aplicaranse sobre o proxecto empresarial e o resumo executivo facilitados polos centros educativos antes do acto (base 10), e sobre a presentación do proxecto empresarial que o alumnado realice presencialmente no acto.

Se os Premios Demo Day se desenvolven de forma telemática (base 8.2), os criterios de valoración aplicaranse sobre o proxecto empresarial, o resumo executivo e a presentación do

proxecto empresarial que o alumnado realice mediante algún tipo de material audiovisual (base 10), que facilitarán os centros educativos antes do acto.

Criterios de valoración			Modalidade presencial	Modalidade telemática
Valoración do proxecto 80 %	Solución innovadora Creatividade na idea de negocio, utilidade do produto/servizo ofertado, mellora para a futura clientela...	10 %	<ul style="list-style-type: none"> • Proxecto empresarial en formato PDF • Resumo executivo do proxecto 	<ul style="list-style-type: none"> • Proxecto empresarial en formato PDF • Resumo executivo do proxecto
	Contribución social do proxecto Tratamento de necesidades existentes na sociedade, integración na economía e na contorna local, impacto no desenvolvemento do territorio, grao de conexión coa realidade...	20 %		
	Solidez e viabilidade do proxecto Equipo promotor, viabilidade económica e técnica, deseño do plan de distribución, comunicación comercial, estratexia no establecemento dos prezos...	40 %		
	Aplicación dos Obxectivos de Desenvolvemento Sostible (ODS) Plans estratéxicos, plans de sostibilidade e outras actuacións que axuden a acadar os diferentes ODS	10 %		
Presentación 20 %	Calidade, claridade e argumentación Calidade e argumentación clara e coherente, selección e creatividade no uso das ferramentas TIC elixidas para a presentación, mostra de produtos ou servizos, uso da imaxe corporativa na presentación...	20 %	<ul style="list-style-type: none"> • Presentación presencial 	<ul style="list-style-type: none"> • Presentación audiovisual

Documento asinado dixitalmente na marxe